

國粹叢書第三集

湖西遺事

國學保存會印行



上海图书馆藏书



A541 212 0007 1591B

湖西遺事

淮南彭孫貽

癸未獻賊別部突江西破萍鄉萬載袁臨吉三郡望風棄城走左良玉以偏師東援大掠三郡城郭爲墟李總憲邦華吉安人也告當事曰江右寔留都上游守者非人殘疆決裂滋甚救此一方非故彭豫章不可請補彭公吉安守是時伯父上海公在公車南昌舒孝廉忠讜先子門下士也因以告伯父走謁李公曰家季守南昌頭鬚爲白偃蹇十五年再典劇郡今老矣幸稍寬其力俾優游南曹乎奈何復以手板困之也事遂寢伯父既登第謁選出都李公卒請於吏部以先子補湖西兵憲且寄謝曰亦知勞苦彭公然爲地擇人不得不爾行矣且夕煩公節鉞耳

寇之掠袁州也岳兵憲虞巒聞儼先去被劾就逮守令以下多以棄城對簿曠撫軍謂袁州嚴司李繩光有幹才表爲湖西道業報可而江右諸公內推

之  
一  
一  
轂於銓曹復以先子補湖西一時遂拜二兵憲先大夫曰吾非擇官辭難者  
彼中已有人矣嚴公好爲之吾將藉手歸我林壑也懸車不復出

甲申南都再建江右薦紳之與勸進者姜公曰廣方大拜劉公士禎蕭公士  
璋爲卿貳臺省諸曹又十餘人聚謀曰吾地以多難借彭公以彭公爲豫章  
能得吏民心今嚴公以明經李官躡憲節倖矣不卹子遺而揮霍自如殘疆  
何恃乎相與揭之銓司嚴公摘去諸公又謀曰吾儕儕嚴公而逐之彭公必  
嫌於扼吭而爭之席也非嚴旨必不起姜公當票擬過得嚴旨單車就道慷  
慨江干謝送者曰國家多難時事不可爲夫人而知之世受國恩而臨難苟  
免所不忍爲此行也是吾致命遂志之秋也又顧貽而曰小子識之吾之志  
昔與若曹言之矣歸事而母無替家風勉之遂西是爲甲申十月之二十七  
日

吉安爲文章節義鄉地扼楚粵咽喉百貨輻輳戶口繁稠自左兵肆掠竄從

山谷中市井蕭條人烟 先子以臘八日蒞湖西士民聞風歡動招徠數月  
稍稍返歸城市

良玉犯闕東下襲九江挾江督袁繼威與俱江上水師黃蜚鄭彩黃斌卿等  
以礮犁沉其舟靖南侯得功扼皖口良玉逡巡引却援勦楚豫總兵金聲桓  
遂據守九江南都旣陷聲桓擁兵向南昌南昌士紳將起兵拒之曠撫軍不  
可將兵走臨江南昌戴國士鏤金爲大字揭諸大紅錦幃率士民焚香羅拜  
迎聲桓聲桓入南昌遂奉江右版圖於豫王豫王以聲桓爲江西總鎮聲桓  
自以有開創江右功自稱開府軍門據坐撫軍署豫王所署撫按拱手聽約  
束而已聲桓及署戴國士爲驛傳道

六月十一日吉安始聞金陵失守聲桓傳檄下諸郡二十四日先大夫建義  
旗誓師江干草檄討聲桓初傳宏光帝幸浙間道遣使奉表武林浙已陷不  
得達

一之  
一  
閏六月曠昭引諸軍屯臨江峽淦之間遇戰屢却退屯吉安七月聲桓進逼吉安諸軍並退屯萬安吉安城中逃竄一空先大夫固留紳士死守無一存者乃往虔中請濟師北兵餉稍集吉人已迎欸王師入郡先大夫迺駐泰和楊學士廷麟蕭祿勛士璋楊御史仁愿咸會於泰和

楊學士臨江人初聞豫章不守諸郡望風俱下將遯跡匡廬郡諸生擁而問曰公何處曰廷麟義不辱將披髮入山無愧晉處士耳諸生曰陶公晉小臣不爲五斗米折腰公大臣也卽事不可知宜以文丞相自處豈得問廬山白社之踪哉公曰念無與共功者廷麟豈敢愛其死遂起兵與先大夫會泰和深相結納龐子介生嘗以箋乞書於公公曰周介生萬世亂臣賊子也彭公客奈何與之同字改字介之云

郡縣守令相繼解印遁去從先大夫於泰和者湯文遂良龐子文治及蒼頭五六而已蕭楊二公灑涕語府君曰江右方倚公鎮撫撫軍不戰江省淪沒

知公忠義然事不可爲願具道里費送公歸故鄉吾儕從此隱矣府君曰諸公幸愛我我之不死於吉者以爲國家數百年功德在民必不至一旦淪喪思舉旗以爲義士先一死不足以塞責也諸公勉之矣因日往來泰和萬安以號召士民之赴義者

烽火充斥先大夫輕舟泊泰和灘上汀蘋沙鳥月色江聲同舟客多淒然故鄉之思咸勸返棹故園追黃冠方外之游先大夫不答徹陰先哲句曰不聽爾言方至此湏知吾道固當然諸客雅知其意迺不復言

七月副將白之裔劫巡撫曠昭降於聲桓之裔將兵屯萬安所在淫掠士民閉城拒之兵民交鬪義兵圍之裔將殺之鳴礮擊死之裔子楊學士及先子力解之迺罷之裔陰通欵於聲桓挾曠公以獻

七月旣望始聞隆武建號於閩中八月李虔督永茂檄先君控守興國興國虔中門戶也蘇閣部觀生以廣兵至陳御史廣以滇兵至李虔督遣虔兵與

諸軍皆會於萬安廣兵跣足跳山谷如飛滇兵甲械尤犀利標鎗連弩洞胸穿扎

九月廣兵虔兵與王師大戰互有殺傷虔廣兵小却於泰和再戰吉安陳方接滇兵自安福至繞其背王師倉卒大奔斬首三千悉衆走峽江南昌大震聲桓具舟將東遁滇兵破老營獲財帛巨萬計戰勝而驕日置酒高會不復進聲桓徐合餘燼兵復振

九月李公以憂去行在拜楊學士爲督帥閣部以萬公元吉代爲虔督以先大夫爲光祿少卿兼江西叅議分守嶺北道十月始聞命吾師復吉安先大夫標下部司熊夢虬用間入城爲內應夜率壯士數十人奮刃大呼守者驚潰擒其所設守令斬之遂復吉安先大夫以兵狗所轄諸縣

十一月萬公自行在至虔中檄先大夫赴虔居守二十二日赴虔中十二月閩中叙屢戰捷功御史湯芬等交章薦改授先大夫太僕寺少卿江西左布



政使仍守嶺北道萬公引諸軍下吉安進討一以居守責成先君拮据兵餉不違寢食

丙戌二月先大夫晉授太僕卿

雩都山寇閻王總倚山嘯聚萬人暴掠南贛所部邑官兵不能討舊督李公檄前守嶺北道于公穎撫之將吏咸索原贖賊露刃反攻于公狼狽走免先大夫至虔復遣官招之賊首羅容等咸聽命先大夫同副將劉天駟單車入賊巢不設兵衛伍伯數人前導賊衆數千夾刃十餘里相迎入深山下車勞之勉以大義因承督府令署其魁四人爲叅游解紅袍衣之給銀牌花幣以三千金犒所部其魁奉觴上壽厚有所獻却之驅車引還

萬公引虔兵自正月至吉安累戰克捷滇廣兵初至鋒銳甚每殪王師一人一騎分其橐少者不下數十金故人樂赴敵滇兵旣破老營金寶

丙戌二月益多遂無鬪志

本朝益增兵設伏誘滇兵入圍中殲之諸軍夾河而壁者屢戰不利二月移營入城中三月二十四日王師奮力攻城城遂陷道臣守令或殺或執屠僇數千人湖西叅將胡長蔭走興國萬公引諸軍退屯萬安潰兵俱溯十八灘而上虔中守止千人先是寇犯湖西士民各繕弓弩火器以禦賊先大夫多方訓諫之人人願效死力

吉安旣屠旋下諸屬縣所至屠夷白之裔導兵下萬安焚僇蕩爲赤地以報怨也四月漸逼虔境湯龐二君勸先大夫謝事東歸不應力挽之拔刀自擬曰吾恨無死所今當與城存亡若曹俱死無益爲我歸報婦子謹守墳墓無相念盖先君已晋太僕卿而守北道已有其人可以謝事卒死不去

八月作書與家人訣併寄還瀕行時所借衣帽數事書數十言反覆自矢舍生取義素志因遣家人三隨湯龐二君東歸廬陵令嚴之偉浙東人也携之自閩間道行十餘月始抵家

王師離虔四十里而軍吉安潰兵盡燒船南走城守兵僅千人登陴揚旗招之不顧而去士民震恐守令潛出城住天竺山下先大夫策馬勞諸軍士民萬餘擁馬首願效死乃與萬公申嚴號令樓櫓戰棚湏臾畢具盡拆附濠民居不及者焚之燒劉兵憲樓船於城下火延建春門煙燭天樓雉俱盡城中驚擾揮兵撲滅之士民蟻附襄版築移時補葺如故是日王師至城下四月十四日也

舟師飛帆蔽江而上列營山下離城二里而軍十八灘怪石嵯峨出沒水底舟行石罅中非熟識此中水道者偶觸立爲齧粉故上灘下灘必募泰和人司舵刺船始得過險入春淫雨水漲江深危礁沉沒水底行無所礙又灘高水迅洶洶崩流更遇南風連旬逆流破浪十帆瞬息利濟若有天助虔守備空虛人心搖動大兵至驟攻一鼓可下王師未審虛寔營壘對城山上氈帳彌望數日迺進攻城城中戰守已備飛礮擊之多死傷迺引去

贛三面距江惟南門小南門枕天竺山路入南安孔道也其東建春門湧金門章貢臺附城屆東北角高出城身俯瞰龜角尾其地最衝將吏請先大夫守南門計與公署近且緩急可南走先大夫捉刀曰是城惟章貢臺最衝非守道誰堪此即移守臺上日移二蒼頭坐臥臺巔小寺中

與先大夫同在虔圍城者蘇閣部觀生楊閣部廷麟郭侍郎維經萬制院元吉王同知明汲及副將徐日彩劉天駟文武將校數十人分門而守萬公居中往來策應劉閣部同升奉命贊決軍務先以病卒於虔

嶺北二道守道駐南安巡道駐贛州劉巡道廣胤駐扎虔中先大夫應駐南安萬公以居守耑倚重先大夫亦慷慨自任與城同存亡

王師將至盡毀拆城外民居龜角尾橫出江上延袤里許可千家聚落蕃盛未即毀撤王師艤舟數十艘隱翳其下伏空屋窺城中夜縋五百人人挾束薪翼以火鎗火筒潛下龜角尾燔之驚跳登舟引去一火赭然舟師將泊城

頭先見之矣

每旦三四攻城必移時乃卻或五更或晡時或黃昏鳴鼓角張雲梯渡水逼城矢礮雨集城頭亦鳴礮反射之多所殺傷必馱尸以去退軍三五欵斜疎落散走不復結陣畏大礮擊其團聚也

有白馬紅衣略陣指揮進攻舉礮斃之奪氣引去王師營對江山上離城二里有黑將軍敢戰嗜殺日事屠僇浴於幕中適舉大礮鐵彈穿幕中擊墜其首士卒不覺也訝其久不起薄而觀之已碎首僵於澡盆也

一夕雲梯襲城已登陴守者始覺緣堞螳附牙將一人揮刀殊死鬪不退乃手執萬人敵火筒擲之鬚眉皆燼火發桶裂鐵菱飛起若火鴉登陴震墜死傷數十人迺走

五月舟師進攻湏臾引卻二舟綴沙尾不去龜角尾水淺可涉夜選敢死千人負九龍火鎗人持長矛翼以短刀縋城下亂流而渡至山下負火筒者俯

之  
一  
樓九龍鎗俱向前然火火鎗齊發燒山上帳房王師驚起多中九龍槍顛踣  
厓谷若流星之隕照水上下城頭呼噪震天地咸登舟拔營走三十里奪二  
舟生擒數人殺之於大江中

圍城二月城堅不可卒拔因以輕兵綴我師分兵下請縣登城望之馬兵緣  
山長數里屬縣多爲屠夷

章貢臺高出城表鳴礮攻臺鉛子紛墮可拾蒼頭張卿攀堞覘之鳥鎗中其  
股踣於先君側六月創甚垂斃萬公楊公捐金療之百日迺起又令蒼頭馮  
吉緣堞望鳥鎗穿其禪而先大夫身當矢石恒不避

劉兵憲廣胤陝西宜川人以明經別駕超擢見圍急赴行在乞師超拜江西  
巡撫將戰船五百艘載火器甲兵順流至贛屯天竺山下王師偵之僞爲贛  
州將校持牒迎撫軍劉公不虞也倉卒攻之被殺資裝舟船盡爲所有城中

喪氣

姚御史奇胤自在奉 命至虔勞軍因留共守王師至虔先大夫移守章貢臺不復入公署出入佩刀騎一白馬二蒼頭從之日與諸公聚議臺上所居一牀一竈一几或童僕俱下自取飯於釜中坐臥携文山集數卷擊節悲吟曰必不慚色古人也

題公署曰朝廷養士三百年報稱正在今日閱閱承恩十二世忠孝豈敢讓人所居蕭寺滿壁題咏見志又書絕命詞咏四五紙藏篋中恒以自隨

初圍贛州數萬人後至益夥連營數十里凡十餘營近萬人白之裔亦在其中縱兵打糧山谷村落雞犬無遺

九月貝勒破閩隆武出亡虔中東傍汀韶南連庾嶺汀延旣斷勢益蹙蘇閣部以迎聖駕爲名走粵中

十月四日贛州城陷府君死之先一日鈴下將獻斗酒隻雞先君曰姚公吾同里久在圍城未得款曲爲我招姚公共晚食酌酒相對歎息曰吾儕堅守

危城七月矣主亡援絕城亡與亡分也與公數千里共危難故鄉已陷卽一死歸骨何途何時恢復神州同以歎段入里門乎唏歔罷飲漏二下因佩刀登城刁斗嚴肅久之還臺上時外兵已乏糧野無所掠攻圍益急城中守禦糗糧猶不絀而將卒觀望有陰與外兵通者三面守甚嚴惟南嚮山路不當圍中一副將守之外兵潛上小南門漏下四更先大夫揮兵馳救之已焚小南門火光燭天守者散走滇廣兵突門南出將吏請先大夫下臺走南安爲後圖叱之曰此吾死所又安往顧諸蒼頭曰若曹各自爲計俱死無爲也開篋取所書絕命詞五人各一紙曰若曹各自去不能俱生一人者先歸以此報訃我婦子拔刀自刎時將吏散蒼頭共抱持之奪其刀先大夫從容諭之曰若急去吾爲人臣誼也死卽死且無爲所辱諸人環泣不忍去給之偵探遂自縊是日之辰刻也悲乎痛哉兵漸近臺諸人奔還已自縊倉皇竄走張卿抱印縋城不得出走署中投池死詹道被創病死馮吉國正被執入營



中吉見殺國正在營數月始逸出間關半載亡歸裸跣黑無人色卽父母不之識所授遺筆在衣帶中裸刼去三人者皆死無一生還絕筆不傳惜乎悲哉

營師多虔吉豫章人素重府君府君旣殉節營將巡行城上見壁間題字多嘆息忠義已而火延臺上俱燼矣二月湖西舊人入虔中共收遺骨瘞章貢臺上

是日同殉難者楊閣部赴水死姚御史被害王同知自盡郭侍衛突圍走萬制院或云殉難或云潰圍出文武官吏死者百十人諸將劉天駟徐日彩等皆降城中室廬焚燬殆盡屠僇數十萬人士女被俘者數萬其不屈節者填河塞井掠至舟中躍入灘中相望

王同知明汲起一科金壇人與先君同籍王公子公培以叅戎效力行間王胥呂公子以職方贊軍事皆爲府君年家子圍旣逼二公子共勸王公去王

氏書  
姚  
山贈  
金捐

公曰彭公吾所信重汝曹往見之二公子俱謁申前意先大夫正色曰干戈  
滿地恨不獲死所見危授命死且不朽尊府君已自處百尺樓豈可勸之墜  
蜻蜨厠溷乎吾志決矣因指壁間所書曰素患難行乎患難語示之二公子  
歸以告王公曰彭公命我矣因先遣家人去卒與先大夫同盡節

湖西遺事終

227500

光緒三十二年九月二十日首版  
光緒三十二年九月二十日發行

(國粹叢書湖西遺事)

定價洋一角

著者 淮南彭孫貽

印行者 上海鐵馬路北愛而近路  
國學保存會

發行人 沈木厂

發行所 上海四馬路東惠福里  
國粹學報館

上海圖書館藏書



A541 212 0007 1591B

